

26/08/1999

10 guru kutuk kerajaan kena tindakan disiplin

KANGAR, Rabu - Sepuluh guru di negeri ini, termasuk seorang wanita dikenakan tindakan disiplin kerana aktif berpolitik dan memburuk-burukkan kerajaan ketika di sekolah.

Menteri Besar, Datuk Seri Shahidan Kassim, berkata sebahagian besar daripada mereka adalah guru berprestasi rendah dan ada di antaranya mengalami masalah mental.

"Memang ada guru di Perlis yang dikenakan tindakan disiplin kerana aktif berpolitik dan memburuk-burukkan kerajaan tapi jumlahnya tidak ramai iaitu hanya 10 berbanding kira-kira 4,000 guru di seluruh negeri ini," katanya, di sini, hari ini.

Beliau diminta mengulas gesaan Timbalan Perdana Menteri, Datuk Seri Abdullah Ahmad Badawi, supaya tindakan disiplin dikenakan terhadap guru yang terbabit dengan politik di sekolah.

Kenyataan beliau itu ekoran pendedahan seorang wakil majlis Dialog Pergerakan Wanita Barisan Nasional (BN) Kedah, bahawa ada guru sekolah rendah bertanya kepada murid mengenai pendirian ibunya dalam politik.

Dalam perkembangan lain, Shahidan meminta pihak berkuasa menyiasat kenyataan Timbalan Pesuruhjaya Pas negeri, Dr Aziz Hanafi, yang mendakwa kemudahan diberi kepada pelabur dari China memasuki negara ini bertujuan menjadikan mereka pengundi hantu oleh Barisan Nasional (BN).

Beliau berkata, kenyataan bersifat fitnah bagi memburuk-burukkan kerajaan itu bukan saja boleh menjejaskan usaha meningkatkan pelaburan oleh usahawan China di negara ini, malah mengganggu hubungan baik dengan negara itu.

"Saya mahu mengingatkan pemimpin Pas supaya berhati-hati ketika membuat kenyataan, jangan suka tabur fitnah asalkan boleh mendapat undi daripada orang ramai," katanya.

Dr Aziz dalam ceramahnya di Kampung Che Ok, Simpang Empat, Isnin lalu, berkata BN mahu menjadikan rakyat China sebagai pengundi hantu kerana mereka sukar dikesan disebabkan hampir seiras dengan penduduk Cina negara ini.

Dalam lawatan Perdana Menteri, Datuk Seri Dr Mahathir Mohamad, ke China baru-baru ini, kerajaan bersetuju memberi kemudahan kepada pelabur dari negara itu mendapatkan visa di mana-mana pintu masuk di Malaysia.

Langkah itu bertujuan memudah dan menggalakkan pelaburan oleh usahawan China di negara ini tanpa mereka perlu terlebih dulu ke Beijing untuk mendapatkan visa.

(END)